



محمد أحمد نوفيقي - مصر

الشمس ماشية مروحة
فاردة الحنين علي كل بيت
والذكري بتلم الدفا ساعة الغروب
و احنا يا دوب فاردين شراع المركبة
والحلم لسه بيتولد جوا السنين
كل الحاجات متكركة ومخلبطة
كل الساعات و من سكات
الوقت عدانا وفات وترك لنا
حبة أتين ونقول لمين
إن الحياة مش بس حبة ذكريات
إن الحياة مش حد كان غالي علينا
سابنا ومات
وترك لنا جوا الميراث
من كلمة حلوة وطيبة
ضحكة تتعكز عالوشوش
فوق الخدود
الدمعة منها قريبة
نازله تنوح م الفراق والاشتياق
مالهوش دوا
غير بس كان حبة صور
متجمعة ف شريط حزين

جوا اليوم الزمن
و مافيش تمن
يقدر بانه يشتري الرحمة ف قلوب البشر
أو يستلف إحساس مشاعر
أو مرة واحدة يختلف عن طبعه
في كسر الخواطر وان كنت شاطر
م انتاش هتقدر ع الغدر من طبع الزمن
والشمس ماشية مغربة فوق السطوح
واقفه الصبية عماله تنشر ف الجروح
يمكن تجف لها الدموع
وتعلق الجرح بمشابك فوق الحبال
جايز ف يوم شمس الشتا
دي تطهر الجرح الحزين
بس الشتا قافله البيبان علي شمسها
و ف ضيها وقت الشتا مالهوش أمان
بتلاقي فيها الحزن شابك
ومتبت المسكة قوووووي
علي طرف توب بتحب دايم تلبسه
هو انتوا ليه بنتقصوا ف حق الضمير
مستكترين ضحكة حزين وبتحسدوه
علي بسمة جاتله مرة صدفة من الزمن
و الشمس ماشية مضلمة
ولون عينيها مليون حمار
واقفة لها طفلة وماسكة ف الإيد ضرسها

ترميه ف عين الشمس يتبدل جديد
وتكلم الشمس المهاجرة لوجدها
كل الطيور بتسابق الشمس ف غروبها
وتبات علي غصن الليلي المجروحين
آآآآآ م السنين ياما فيها ناس بتعلي ناس
بس الأساس والأصل واطي
طبع الخسيس مهما بيعلي يفضل مطاطي
يا اللي انتوا بتغلوا الرخيص وتقدروه
الشمس دايرة ع الزمن بتجيب ف ليل
وبتفرش الصبح بنهار مليون حنين
قادرة ف يوم تطوي كرات الزمن
وتبدله وتحوله من ليل بيملاه السواد
لفجر مليون ب الأمل من ضيها
ممكن تحقق مستحيل مين زيها
شمس الأصيل ولا مرة غابت
مهما السحابه تصدها
بتحطم الغيم بالشعاع
وسهامه مليونه بنور
بيرسوم الضحكة ف خضار
علي غصن ورد
روح المحبة لو ف القلوب
تصفي النفوس من أي حقد
تبدر حنين ويا البذور
والشمس مابتحرقش أرض

مليانة خير مافيهوش رياء
و لا غل قلب
الشمس تطلع ف كل يوم بخير وحب
وسؤالها متكرر يوماتي
هل من محب؟
هل من محب